

Melayu usah lepaskan peluang: PM

Oleh Kadir Dikoh

BH 20 APR 2001

GENTING HIGHLANDS, Khamis - Datuk Seri Dr Mahathir Mohamad hari ini menasihati orang Melayu supaya jangan sengaja melepaskan peluang daripada revolusi maklumat sekarang ini.

Perdana Menteri berkata, jika mereka terlepas peluang itu kali ini, seperti juga orang Islam sudah terlepas peluang revolusi perindustrian, mereka tidak mungkin dapat mengejar kemajuan.

"Kita akan terus ditindas dan ditakluk oleh bangsa yang akan menguasai teknologi dan maklumat alaf baru ini. Kita akan dijajah semula. Orang Islam sudah terlepas peluang revolusi perindustrian.

"Janganlah orang Melayu di Malaysia sengaja melepaskan peluang daripada revolusi maklumat," katanya ketika berucap merasmikan Konvensyen Perdana Pendidikan Kebangsaan 2001 di Institut Aminuddin Baki (IAB) di sini.

Konvensyen empat hari itu yang dihadiri kira-kira 500 pegawai pendidikan dan pengetua sekolah dari seluruh negara bertujuan melihat serta menilai hala

Orang Melayu tidak mungkin dapat mengejar kemajuan dan akan ketinggalan jika sengaja melepaskan peluang untuk menguasai teknologi pada revolusi maklumat sekarang ini

tuju kepemimpinan semasa pemimpin pendidikan dalam konteks pemimpin sebagai penggerak wawasan.

Hadir sama Menteri Pendidikan, Tan Sri Musa Mohamad; Penasihat Agama Perdana Menteri, Datuk Paduka Dr Abdul Hamid Othman; Ketua Pengarah Pendidikan, Abdul Rafie Mahat dan Pengarah IAB, Dr Wan Chik Rahman Wan Din. Dr Mahathir kemudian mengadakan majlis dialog tertutup selama lebih sejam.

Perdana Menteri berkata, ilmu pengetahuan dan nilai yang mulia juga perlu seiring dalam melahirkan masyarakat yang baik dan berjaya.

"Ilmu pengetahuan tanpa nilai yang mulia belum tentu dapat melahirkan masyarakat yang baik. Sebaliknya, nilai-nilai yang mulia tanpa ilmu penge-

tahuan juga tidak akan melahirkan masyarakat yang berjaya.

"Memang benar ibu bapa juga bertanggungjawab untuk menyemai nilai-nilai murni yang baik tetapi ibu bapa mungkin tidak terlatih sama ada berkenaan dengan nilai-nilai yang patut menjadi pilihan atau cara yang berkesan untuk menyemainya," katanya.

Oleh itu, kata beliau, pendidik bertanggungjawab untuk membentuk generasi baru yang lebih berpengetahuan dan berperibadi yang sesuai untuk kejayaan sesebuah masyarakat.

Katanya, jika sesebuah masyarakat itu tidak mempunyai budaya yang sesuai, pengembangan budaya baru yang lebih sesuai perlu diusahakan dengan secara sengaja melalui latihan dan usa-

ha menyebar nilai yang baik itu kepada pendidik terlebih dulu.

“Jika pendidik sudah terima dan menerap budaya baru ini, dan dilatih secara khusus untuk menyemaikannya di kalangan murid dan pelajar, maka proses membentuk budaya baru yang sesuai dengan kemajuan boleh dilaksanakan dengan berkesan,” katanya.

Bercakap kepada pemberita kemudian, Dr Mahathir berkata unsur membenci pemimpin dan kerajaan tidak harus disemai di kalangan pelajar kerana tindakan itu juga ber-

canggah dengan ajaran Islam yang mengajak umat bersaudara.

Katanya, pelajar terutama di sekolah agama juga harus menumpukan perhatian kepada pendidikan, bukan cenderung kepada politik yang boleh mengganggu proses pengajaran mereka.

“Kalau pelajar dihantar ke sekolah agama dan mereka belajar mengenai agama, tak ada masalah. Tetapi kalau kita pergi ke sekolah agama, yang diajar (adalah) kerajaan ini tidak Islam, tidak melaksanakan hukum hudud, sebab itu perlu menentang kerajaan

ini dan kita perlu menjatuhkan kerajaan...itu bukan agama.

“Itulah yang diajar termasuk di Tadika....tunjuk gambar pemimpin, suruh ludah, suruh pijak...itu kah agama?. Mereka menyalahgunakan peluang, cakap pasal agama tetapi yang dilaungkan lain daripada agama, bahkan bertentangan dengan agama,” katanya.

Dr Mahathir berkata demikian ketika diminta mengulas mengenai sama ada kecenderungan ibu bapa menghantar anak mereka ke sekolah agama disebabkan pengajaran

mata pelajaran agama di sekolah kebangsaan tidak memuaskan.

Beliau berkata, kerajaan tidak mempunyai sebarang masalah asalkan pelajaran agama diajar dengan betul.

Ditanya mengenai sistem pendidikan sekolah Cina yang dikatakan lebih baik berbanding dengan sekolah kebangsaan, Dr Mahathir berkata: “Kalau ada perbezaan sekolah Cina dengan sekolah kebangsaan, ini juga berasas kepada budaya yang mempengaruhi ciri-ciri sekolah Cina lebih menarik.”